

मार्निंग डोगरी न्यूज़ बुलेटिन, समें. 09.20 Hrs

<><><><><><>

Headlines

1. चुनांs आयोग मुख्य भरै च मतदाता सूचिएं दी विशेष नजरसानी करोग।
2. उपमुख्यमंत्री सुरेंद्र चौधरी होरें M&HE मैहकमे दी तैयारिएं दा जायजा लैता। मौसमी हालात दे मददेनजर लोकें दी सुरक्षा, लोकें गी होने आहली असुविधा गी घट्ट करने लेई पूरा पराता सरिस्ता तैयार रखने लेई गलाया।
3. उपमुख्यमंत्री होरें हत्थखड्डी ते दस्तकारी मैहकमे दे कम्मकाज दा जायजा लैता ते कारीगरें ते बुनकरें दी भलाई-बेहतरी प्रति सरकार दी बचनबद्धता जाहिर कीती।
4. मुख सचिव अटल डुल्लू होरें आई.टी मैहकमे ते NIC J&K दे कम्मकाज दा जायजा लैता। डिजिटल एसेट्स दे प्रबंधन लेई E-SAM पोर्टल जारी कीता।
5. सेहत सचिव होरें आखेआ ऐ जे बच्चें गी घट्ट थमां घट्ट दवाई देनी लोड़चदी, 2 बरें थमां हेठली उम्री दे बच्चें गी खंग जां जुकाम लेई दवाई देने थमां बचना लोड़चदा।

<><><><><><>

Pan India SIR

मुख चुनांs आयुक्त ज्ञानेश कुमार होरे आखेआ ऐ जे चुनांs कमीशन नै मुख्य भरै च विशेष नजरसानी आहला अभियान चलाने दा फैसला पैहले गै लेई लैते दा ऐ। कल नमीं दिल्ली च संवाददाता सम्मेलन गी संबोधित करदे होई उनें आखेआ जे पूरे भारत च हर इक राज्य ते केंद्र शासित प्रदेश च एह अभियान चलाने लेई तरीकें दी औपचारिक घोशणा दा फैसला तौले गै लैता जाग। बिहार च विधानसभा चुनांs कोला पैहले चुनांs आयोग नै विशेष नजरसानी आहला अभियान चलाया हा जेदे कन्नै 69 लख मतदाताएं दे नां सूची थमां हटाए गे। इन्दे च गैर कन्नूनी तरीकें राएं इत्थे रवारदे प्रवासी ते इक शा मते मतदाता पंछान पत्रर यानि वोटर आई.डी कार्ड रक्खने आहलें दे नांs बी शामिल हे।

<><><><><><>

EC-Bi-Polls

भारती चुनांs आयोग नै बिहार च असेंबली दे चुनाएं दे कन्नो-कन्नी जम्मू-कश्मीर च नगरोंटा ते बडगाम असेंबली सीटें लेई उप-चुनाएं दे कार्यक्रम दा बी अज्ज ऐलान करी दिता ऐ। इस सरबंथै च इक संवाददाता सम्मेलन गी संबोधित करदे होई भारत दे मुख्य चुनांs आयुक्त ज्ञानेश कुमार होरें ऐलान कीता जे जम्मू-कश्मीर दिएं इनें द'ऊं असेंबली सीटें पर उप-

चुनांs औंदी 11 नवंबर गी करवाया जाग ते वोटें दी गिनतरी दा कम्म 14 नवंबर गी होग। उपचुनांs लेई अधिसूचनां 13 अक्टूबर गी जारी कीती जाहग जिसलै के नामज़दगियां दाखल करने दी खीरी तरीक 20 अक्टूबर होग। मेदवारें दे नामज़दगी आहले कागदें-पतरें दी जांच 22 अक्टूबर गी होग ते मेदवार जेगर चाहन तां 24 अक्टूबर तगर अपनी मेदवारी परताई सकडन। ध्यानजोग ऐ जे मुखमंत्री ओमर अब्दुल्ला होरें पिच्छले बरें होए दे असैम्बली चुनाएं च बडगाम ते गांदरबल, दौनें सीटें परा जित हासल कीती ही ते मगरा उंनं बडगाम दी सीट छोड़ी देने दा फैसला लैता हा। एहदे अलावा नगरोटा दी असैम्बली सीट, पिच्छले बरें 31 अक्टूबर गी बीजेपी नेता देवेन्द्र सिंह ठाकुर हुंदा काल होई जाने पर खाली होई गई ही।

<><><><><><>

Dy CM Snow Clearance

जरूरी चीजें बस्तें दी उपलब्धता ते कश्मीर खिते च महत्वै आहले इदारें दे सुचारू कम्मकाज गी यकीनी बनाने लेई उपमुखमंत्री सुरेंद्र चौधरी होरें इक उच्च सतह दी बैठक लाइयें मकेनिकल ते हास्पिटल इंजीनियरिंग मैहकमें दे कम्मकाज ते तैयारिएं दा जायजा लैता। बैठक दरान उपमुखमंत्री होरें बड़ी मती ठंड आहले मौसम करी पैदा होई दिएं चुनौतिएं खास करी कश्मीर घाटी ते जम्मू खिते दे ओह इलाके जित्थे बर्फबारी हुंदी ऐ, उत्थे उपलब्ध सहूलतें दा जायजा लैता। बड़ी मती बर्फबारी होने दी आशंका दे मददेनजर उंनं मैहकमें गी हिदायत कीती जे ओह भलेआं अज्जै-कल्लै स्हाबै मशीनां, तौले कारवाई, यातायात गी सुचारू बनाने ते लोकें दी सुरक्षा गी यकीनी बनान।

<><><><><><>

Dy CM H&H Review

उपमुखमंत्री सुरेंद्र चौधरी होरें हत्थखड्डी ते दस्तकारी मैहकमे दे कम्मकाज ते कारकरदगी दा इक उच्च सतह दी बैठक दरान जायजा लैता। बैठक दरान उपमुखमंत्री होरें गी चलाई जा'रदी बड़ी मती महत्वै आहली फ्लैगशिप स्कीमें ते हत्थखड्डी ते दस्तकारी क्षेत्र गी लाह पजाने लई चलाई जा'रदी नीतिएं दी बी जानकारी दिती गई, खास करी ध्यान नमीं उन्न, हत्थकरघा ते दस्तकारी सरबंधी नीति पर दिता गेआ। उपमुखमंत्री होरें प्रशासनिक मैहकमे गी हिदायत कीती जे ओह पैहले ते मगरा आहले बरें दे आंकड़ें गी दिक्खन ते अगली बैठक च उंनंगी आहनन तां जे इक सेई ते पूरा पराता खाका तैया कीता जाई सकै। उंनं इक बारी फही दोहराया जे सरकार दस्तकारें ते बुनकरें दे कल्याण लेई बचनबद्ध ऐ।

<><><><><><>

GST-Maharashtra

जीएसटी दियां नमियां दरां 22 सितंबर थमां लागू होई गेदियां न ते इंदा लाह समाज दे हर तबके गी थोआ करदा ऐ। अज्ज इक नजर जीएसटी सुधारें थमां महाराष्ट्र दी अर्थ बवस्था पर पौने आहले सकारात्मक प्रभावें पर। तगड़ी कृषि, बंज बपार ते सेवा क्षेत्र आहली महाराष्ट्र दी अर्थ बवस्था गी हाल च गै होए दे जीएसटी सुधारें थमां मता लाह पुज्जा ऐ। नमें जीएसटी सुधार महाराष्ट्र दे करसानें, कारीगरें ते लौहके कारोबारियें लेई बड्डी राहत ऐ। नमें कर ढांचे तैहत राज्य च नेकें बस्तुएं पर हुन पैहले दे 12 प्रतिशत दे बजाय 5 प्रतिशत जीएसटी लगगोग। एह गेंs महाराष्ट्र दे चीनी क्षेत्र लेई सार्थक ऐ ते खंड 6-7 प्रतिशत सस्ती होई जाग जेदे कन्नै 50 लख शा मते गन्ना करसानें ते 2 लख मिल मजदूरें गी लाह पुज्जोग। समुंद्री उत्पादें पर टैक्स 12 फीसदी थमां घटाइयें 5 फीसदी करी दिता गेआ ऐ।

<><><><><><>

ते हुन बाकि दिएं खबरें कन्नै अभिलाषा शर्मा।

CS-IT Review

मुख्य सचिव अटल डुल्लू होरें कल जम्मू-कश्मीर च सूचना प्रौद्योगिकी विभाग ते राष्ट्री सूचना केंद्र दे कम्मैं-कार्जे दा जायजा लैने लेई इक उच्ची सतह दी बैठक दी अध्यक्षता कीती। बैठक दी शुरुआत च मुख्य सचिव होरें साइबर सुरक्षा दे महत्व पर जोर पाया ते तहसील थमां ब्लाक स्तर तगर इसी होर मजबूत करने दा आह्वान कीता। उन्नै सूचना प्रौद्योगिकी विभाग गी निर्देश दिते जे ओह समूलचे जम्मू-कश्मीर च सबबै तहसील दे ब्लाक दफतरें च ई-आफिस नेटवर्क दा व्यापक विस्तार यकीनी बनान। एहदे अलावा मुख्य सचिव होरें उन्नै दफतरें बारै तफसीली रिपोर्ट मंगी जेडे अजें तगर ई-आफिस सरिस्तें च शामिल नेई होए न। एहदे शा पैहले उन्नै E-SAM (Electronic system of asset management) पोर्टल दी शुरुआत कीती जेहदा मकसद लागत ते जोखम गी घट्ट करदे होई परिसंपत्तियें दे बेहतर इस्तेमाल गी यकीनी बनाना ऐ।

<><><><><><>

Secy. Rational Drug Use

सेहत ते मेडिकल शिक्षा सचिव डॉ. सैयद आबिद रशीद शाह होरें बच्चें आस्तै दोआइयें दा इस्तेमाल बड़ी समझदारी कन्नै करने दी सलाह दिती। श्रीनगर दे सिविल सचिवालय च लग्गी दी इक बैठक दी अध्यक्षता करदे होई उन्नै एह गल्ल आकखी। एह बैठक केंद्री सेहत ते परोआर कल्याण मंत्रालय आसेआ हाल च जारी इक नोटिस दे बाद सददी गेदी ही जेदे च इस गल्लै दी सफारिश कीती गेई ऐ जे द'ऊं बरें शा हेठली उम्मी दे बच्चें गी खंग ते जुकाम दियां दोआइयां नेई दितियां जान। बैठक दरान डॉ. सैयद होरें पूरे जम्मू-कश्मीर च बच्चें दी सेहत दिक्खभाल लेई दोआइयें दा समझदारी कन्नै इस्तेमाल पर जोर पाया ते सबबनैं सरबन्धत पखें गी निर्देश दिते जे ओह राष्ट्री सतह दे दिशा-निर्देशों दा सख्ती कन्नै पालन करन।

<><><><><><>

Fintech Fest

6मां ग्लोबल फिनटेक सम्मेलन अज्जै थमां मुम्बई च रम्भ होआ करदा ऐ। खजाना मंत्री निर्मला सीतारमण सम्मेलन दे उद्घाटनी इजलास च शामिल होडन। सम्मेलन दा सिरलेख ऐ ए.आई चलित विश्व ताई पैहे दी उपलब्धता। प्रधानमंत्री नरेंद्र मोदी ते बरतानिया दे प्रधानमंत्री कीर स्टारमर वीरवारें सम्मेलन गी संबोधित करडन। दौनों लीडर बंज बपार कन्नै जुड़ी दियें मुख हस्तियें, नीति निर्माताएं ते नवाचार कन्नै जुड़े दे लोकें कन्नै मलाटी बी लाडन। सम्मेलन दा मुख आकर्षण भारत ए.आई एक्सपीरियंस जोन होग। इसी भारत दी नेशनल पेमेंट कार्पोरेशन ते अमरीकी कंपनी NVIDIA आसेआ लाया गोआ ऐ। सम्मेलन च 400 शा बद्द प्रदर्शनियां होडन।

<><><><><><>

SMVD-Yatra

मौसम विभाग आसेआ जारी परामर्श ते लगातार होई दी बरखें दे मददेनजर श्री माता वैष्णो देवी जी दी यात्रा लगातार त्रीए रोज बी स्थगित ऐ। एह यात्रा 5 अक्टूबर गी स्थगित कीती गई ही। एह गैंs श्रद्धालुएं दी सुरक्षा, रस्ते पर बनी दी तलैट ते खिते च ल्हास-पस्सियां पौने दी बनी दी चुनौती दे मददेनजर पुट्टी गई ऐ। बोर्ड प्रशासन ते रियासी जिला प्रशासन आसेआ हालात दा जायजा लैता जा'रदा ऐ तां जे मौसम दे बेहतर हुंदे गैं रस्ते पर यात्रा सुचारू ढंगे सिर बहाल होई सकैं। जेड़े श्रद्धालु पैहले गैं कटड़ा पुज्जी चुके दे न उनेंगी हिदायत कीती गई ऐ जे ओह अपनी-अपनी थाहरें पर गैं रुकन ते अगले हुकमै तगर अगड़ी यात्रा नेई करन।

<><><><><><>

DIC-Ramban

रामबन च जिला उद्योग केंद्र आसेआ बेरोजगार युवाएं गी प्रधानमंत्री रोजगार सृजन कार्यक्रम दे राएं विनिर्माण ते सेवा दौनों खेतरें च उपलब्ध माली मदाद ते सब्सिडी बारै जानकारी देने लेई लगातार कम्म कीता जारदा ऐ। एहदे अलावा केंद्र प्रायोजित स्कीम एन.सी.एस.एस ते जम्मू-कश्मीर औद्योगिक नीति तैहत होरनें दुए कार्यक्रमें गी बढ़ावा दिता जारदा ऐ। युवा ते विधायी इनें स्कीमें खास करियै प्रधानमंत्री रोजगार सृजन कार्यक्रम दा लाह ठोआइयै अपना कारोबार शुरू करी सकदे न। आकाशवाणी समाचार कन्नै गल्ल करदे होईडी.आई.सी रामबन दे जनरल मैनेजर रविंद्र कुमार होरें आखेआ।

<><><><><><>

JMC Jt. Comm.

जम्मू नगर निगम दे जायंट कमिशनर अब्दुल स्तार होरें कल जे.एम.सी दे सेहत ते सफाई अधिकारियें कन्नै इक तफसीली जायजा बैठक लाई जेहदा मकसद जम्मू शैहरा दे सब्बनै वार्डें च साफ-सफाई सरबन्धी गतिविधियां, कूड़े-कचरे दा प्रबंधन ते सार्वजनिक स्थिति दा जायजा लैना हा। बैठक दरान जायंट कमिशनर होरें जी.पी.एस ट्रेकिंग राहें, घर-घर जाइयै कूड़ा किट्ठा करने आहली गड्डियें दी निगरानी दी जांच कीती। एहदे अलावा उने निर्माण कम्ममें आहले कचरे गी किट्ठा करने ते उसी नबेड़ने दे कम्ममें दी बी समीक्षा कीती ते इस गल्लै पर जोर दिता जे शिड़कें दे कंडे ते खाली पेदे प्लाटें पर गैर कनूनी ढंगें नै कचरा सुट्टने प सख्ती कन्नै रोक लाई जानी चाहिदी।

<><><><><><>

Read by: Shruti Khajuria and Abhilasha Sharma

D.E.O : Varinder Kumar

Editor : Kunal Shrivatsa